

2760. XIV, 1-7 — Carta de el-rei de Castela pela qual ordenou que el-rei de Portugal pudiesse partir todos os herdamentos do Algarve e dá-los como lhe parecesse. Sevilla, 1264, Setembro, 20. — *Pergaminho. Bom estado.*

Conoçuda cosa sea a todos los que esta carta vieren e oyeren que yo Don Alfonso por la gracia de Dios rey de Castiella e de Leon e del Andalucía otorgo a vos Don Alfonso por essa misma gracia rey de Portugal que vos podades libremente partir e yguar todos los heredamientos del Algarve assi como vieredes por vuestra pro e de vuestra tierra e de vuestros fijos e otorgo a vos que dedes fuero a los ombres del Algarve qual tovieredes por bien e aquel fuero que vos dieredes en el Algarve aquel vala e sea firme e estable e otro non. E otrosi vos otorgo de todos los donadios que yo di en el Algarve que fagades dellos como tovieredes por vuestra pro e de vuestros fijos. E otorgo a vos que todo ombre que se agraviar de juyzio o d'otra cosa que se non pueda alçar a otri sinon a vos o a vuestro fijo Don Denis o al otro vuestro fijo que el Algarve tovier.

E quito a vos pora siempre estas quatro cosas davandichas que yo retenia por vuestro otorgamiento pora mi en el Algarve en mi vida que vos e Don Denis o el otro vuestro fijo o fija que toviesse el Algarve erades tenudos de fazer e de guardar a mi en mi vida por las cartas que ende son fechas entre mi e vos e seelladas de nuestros seellos de plomo.

E si sobrestas quatro cosas algunas convenencias o alguna pena eran puestas entre nos quito vos las pora siempre e des aqui adelant e non valan e todas las otras cosas que son puestas en las cartas que entre mi e vos son fechas fiquen salvas e firmes fuera ende estas quatro cosas que son sobredichas. E los castiellos del Algarve esten en aquella fialdade que es puesta en las cartas que ende son fechas entre mi e vos pora cumplir se a mi la ayuda e el servicio que a mi deve seer fecho por el Algarve de los cinquenta cavalleros en mi vida assi como yaze en las cartas davandichas e que los cavalleros que tovieren essos castiellos del Algarve en esta fialdade puedan ende fazer aquel derecho que ende deven a fazer sobre pleyto desta ayuda e deste servicio.

E los castiellos del Algarve sean guardados de mi parte e de la vuestra que non sean furtados ni forçados ni pedidos de mi parte ni de la vuestra a los cavalleros que los tovieren e que puedan ende fazer aquel derecho que es puesto en las mis cartas e en las vuestras sobre pleyto de la davandicha ayuda e servicio. E que esto sea firme e estable e non

pueda venir en dubda. Do a vos onde esta mi carta abierta seellada de mio seello de plomo.

Fecha la carta en Sevilha por mi mandado sabbado veynte dias andados del mes de Setiembre en era de mill e trezientos e dos annos.

Yo Millan Perez de Aellon la fiz escrevir en el anno trezeno que el sobredicho Don Alfonso rey de Castiella e de Leon regno.

(A. E.)